

Home > THIBAUT DE CHAMPAGNE > EDIZIONE > De grant travail et de petit exploit > Edizioni > Wallensköld

Wallensköld

I.

De grant travail et de petit exploit
voi le siecle chargé et enconbré,
que tant sommes plain de maleürté
que nus ne pense a fere ce q'il doit;
ainz avons si le Deable troussé
qu'a lui servir chascuns paine et essaie;
et Dieu, qui ot pour nos la cruël plaie,
avons mès tuit arriere dos bouté:
mult est hardiz qui pour mort ne s'esmaie.

II.

Deus, qui tout set et tout puet et tout voit,
nos avroit tost un entredeus geté,
se la Dame, plaine de grant bonté,
qui est lez lui, pour nous ne li prioit.
Si tres douz mot plesant et savoré
le grant coroz du grant Seigneur rapaie.
Mult par est fous qui autre amor essaie,
qu'en cesti n'a barat ne fausseté,
ne es autres ne merci ne manaie.

III.

La soriz qiert, por son cors garantir
contre l'iver, la noiz et le forment,
et nous, chetif! N'alons mès riens querant,
quant nos morrons, ou nos puissons guerir;
nous ne cerchons fors qu'Enfer le puant.
Ore esgardez q'une beste sauvage
porvoit de loing encontre son damage,
et nous n'avons ne sens ne escient;
il m'est a vis que plain sommes de rage.

IV.

Deables a geté pour nous sesir
quatre aimeçons aoschiez de torment:
Couvoitise lance premierement
et puis Orgueil pour sa grant roiz enplir;
Luxure va le batel trainant,
Felonie les gouverne et les nage.
Ensi peschant s'en viennent au rivage,

dont Deus nos gart par son conmandement,
en qui sainz fonz nous feïsmes honmage!

V.

Les preudonmes doit on tenir mult chiers
la ou il sont et servir et amer,
mès a paines en puet on nus trouver,
car il sont mès si com li faus deniers
que on ne puet en trebuchet verser,
ainz le gete on sanz coing et sanz balance;
torz et pechiez en eus fine et commence.
faus tricheor, bien vous devroit menbrer
que Deus prendra de vos cruel venjance!

VI.

A la Dame qui touz les biens avance
t'en va, chanson! S'el te veut escouter,
onques ne fu nus de meillor cheance.

- letto 703 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wallensk%C3%B6ld-28>